

充無論

章士釗

六月十三日政變以來。正義驟張。輿情大起。除一部分人中於貪邪阬於形勢者外。無南無北。無滯無隨。無士無農。無工無商。於今之千位亂紀夥同竊國之武夫墨吏。莫不同聲征伐。此誠可見人心之大同。而國命於焉付託者也。瞻念前途。足抒歡抱。雖然。凡此特一負面之作用耳。有負無正。則國家如何締構。社會如何安頓。似俱莫由論思。天下紛紛。豈徒前門其逐一狼所能了事者乎。輿言於此。有心者又蹙額焉。其故則黨派太多。利害不一。就中乃無一昭大信孚衆情之大系。足資統攝。軒甲輕乙。徒益絲棼。甚且法無可貸邦命在手之國會。亦以會衆昏瞶。累及機體。大爲當世所怒罵。邇日爭言改制。嘗試之說遽起。如所謂瑞士式之委員制者。羣談角智。俱有精英。然其贊否之施。不外以所戴所部之希望感情爲之的殼。哆然張口。內蘊立呈。謀猷如川。都成廢料。深識如吾家太炎。至戒同人勿遽提案。蓋以公敵未摧。用力宜一。誠恐以列坐爭英之故。懈其併命禦侮之方。言念及茲。可爲悲歎。取證往事。慷慨尤深。辛亥之役。排滿負也。革命立憲諸黨一心赴之。而大功成。語及正業。乃大分裂。嘈嘈嗷嗷。以次斃於袁世凱巨棒之下。而清流之政治生涯中絕。護國之役。討袁負也。袁黨而外。投袂併起。千人所指。袁不得不死。及語正業。各派之分裂。其細碎又逾於前。考其角逐離合之迹。張勳復辟一事。似爲當時政勢所必出之一尾閥。傾張負也。合而成。成而及正。及正而裂。仍如疇昔。下至倒安福之役。驅

率軍之役。其所以爲負者俱有可觀。一爲其正、莫不大謬。今者共約爲負之時期又至矣。其所以籌商裨闡。推校得失者。固止於應付目前。共摧一敵。與前舉排滿倒袁諸役相等。以勢揣之。今之爲敵者。凡庸卑隘。不成幹局。爲清流所不歸。國論所不齒。比之清袁。不啻螻蟻。負業之成敗利鈍。蓋不必計。至於所謂正者。其將撲勢如蛾。察物若鼠。寸權尺利。圖視而起。陰毒左計。不擇人而施。昨同患難。倏成胡越。卒乃爲他一人驅除難。已以相煎。同歸於盡。如十二年中諸番變亂所演之迹象矣乎。抑昭然有覺。介然自抑。葆同盡異。一協大公。以蘇國命而新政紀矣乎。方今乖氣塞天。陰謀溢地。人持磨心之論。家宗什匿克之談。如後之說。八九以爲絕望。而愚獨以爲不然。剝上九言碩果。陽窮於上。復生於下。今日時局。壞至無可更壞。未始非各方澈悟回頭覓路之時。人之欲善。誰不如我。未得其道。乃成昏瞽。上言屢爲正業。未得善果。而爲負則明明有成。今當嚴守負面之精神勿失。而勤求正負所以一貫之方。凡正之有妨於負者。一切屏斥。其方未得。姑徐徐焉。不圖急功。不營苟利。勿違初心。勿背同道。千曲百折。務以達到正負諧和之域爲止。夫以此義實施於政。其象何若。雖未能指事模寫。而政治上能由是育成一種準情合理之新生命。則可斷言。孟子曰。人能充無欲害人之心。而仁不可勝用也。人能充無穿窬之心。而義不可勝用也。此其爲說。無非欲人以尅治負面之用心。推而用於正面。當其用正。覺爲客感所中。又或迷罔不見指針。一回溯其所以爲負者之如何自克自奮。則神智可以立清。淫邪可以退聽。吾國儒學之重克己。講節欲。政治之尙無爲。尊臥治。豈是皆從消極入手。胥本是義。惜其論域過大。非本篇能詳。今茲所欲強聒於諸君者。則本負作正一語而已。由此分截。乃有衆目。意念所及。

欲談二議。一曰知足。一曰量能。此其貌庸意遠。有待申釋。請先言知足。

前清光緒二十九年。愚與家弟勳士及黃克強張博泉徐佛蘇之徒。以革命故。同羈滬獄。苦不得解。楚囚言志。互道出獄後之所當有事。愚謂必設牛肉店於西湖道上。雖不得美婦。亦常追慕長卿。鬻食佐讀以終其身。諸友各擬一業。大抵去愚設牛肉店不遠。迨一得釋。以其機遇無一不勝於混合裁判制下之牢室也。前所約言。乃浸忘之。二十年間。無恥冒進之事。雖不敢爲。然無論窘至何境。愚終未嘗以有曠鼻揮可著。自爲慰藉。苟非再墮李斯之末運。則牽黃犬出上蔡門之已事。當不更繫於懷。其在他友。亦必如是。此愚執筆偶爾憶及之一事也。辛亥革命以來。凡軍事窘時。桀者祇求某種目的能達。餘事即置不問。讓人之誓。歸田之約。張皇文告。舉國皆知。達矣。則又以無事爲不樂。坐廢爲可醜。所謂讓人。號稱以退爲進。所謂歸田。止於避居租界。凡可以傾敵自中。重布其權勢者。機變百端。陽排陰擠。無所不用其極。一遭傾跌。其前此差足自保之基地盡廢。悔恨之餘。步伐大亂。復不惜離棄宗旨。毀裂譽望。以賣羞乞憐不可告人之要約。四出提攜。在敵昔求之而不得。今得之而不厭。在我昔故靳而不施。今濫施而人不以爲惠。十餘年間。國內差有歷史約略可數之各派勢力。有若七巧板然。變亂一次。新拚合一次。攻守無定策。友讎無定位。分合變換。爲時之適。考其歷程。殆莫不迴環於上舉各境。任執一派。當頭而捧喝之。謂彼早知如此。何必當初。其不爽然而不知所答者。幾希。愚自知有政治運動以還。並世間人政士。其能確明分位。釐然自守。成不求增。敗不允減。以有本有末之政略。與不淫不屈之政德。爲天下先者。吾見實罕。此愚追懷前獄而又通觀政迹之所起之一念也。今者大同聯合

之聲。復寢盛矣。苟其不蹈已往之覆車。而於今後之政治塗轍。開一新境。則必自各派之有大覺悟始。而大覺悟又必自知足始。愚之自律。在無往不得開牛肉店。所以尸祝時賢。使與交勉。雖不敢代提何事。要在無悖老氏不辱之義。

何謂量能。夫計能授職。本吾古訓。特自稗販外說。創行憲政。以資格爲不便。視樹黨爲天經。夸誕爲其本能。奔競乃得美仕。於是一無所知之輩。崇朝而無所不知。一無所能之夫。轉瞬而無所不能。共和十二年。政局之無甯日。沐猴之戲。愈演愈不成形。小人之無忌憚。一往而無底止。職是之故。吾所模習政爭之標語。曰倒閣。復曰組閣。倒者倒人。組者自組。其所終日表裏唱道者。無非媒孽人而自譽。謂己當國。政將何出。民因以福。國因以利。凡此皆敵黨之所不能爲。不肯爲。泊所謂當國者。一旦實現。其昏庸貪鄙。無所施爲。衡之舊尹。殆過之無不及。天下滔滔。即名流亦不獲免。以知能與不能。用邏輯兩刀論法。樹爲二範。將所有人類。各隸其一。而已皦然白晝能範。強致異己者悉隸不能範。因以己所謂能。用力傾陷人之不能。使得政由己出。恣所欲爲。而號稱不能者。盡標而出之門外。乃萬不可通之政理。而竊國亂政之大原。蓋人各有能有不能。乃材性自然之勢。國家號臻上理。亦各致能者於相當位次。俾獲如量施展已耳。焉有束縛馳驟。盡弛盡張。如今之剽竊西方政治之所爲者。乃者上海總商會。有民治委員會之設。否認北京政府。否認國會。而自行選舉三十五人爲委員。代行全國所有民政之事。名號之大。從來未有。此其見義勇爲。不辭重遠。一洗該會痺癱恒怯在商言商之積習。誠足佩仰。然而乖戾不衷於理。不協於情。可斷其無所成就者。則彼不獨商會以外之力能。望風排抑。即上海以

外之商人團體。彼亦不予包容。徐季龍所諷爲商人政府者。且不過得半而近似也。時至今日。欲以一派人之智能。籠罩全局。萬無是事。即言政理。謂當以籠罩全局之業。寄諸一人或一機關。以完成自來法家所稱薩威稜帖之觀念。亦屬陳言。法儒狄驥近著國家論。敷陳此義。至爲精透。蓋國家者無他。亦諸種職務之總隨而已。職務井井。而各達其最大之效率。斯爲理想之邦。下一等者。其國之真價亦下一等。狄氏所謂近世國家之基本原則。不在權威而在公職。洵爲法學最進步之一闡明。然職務何由而井井。效率何由而得其最大。則其精要。在人人自認己身之所能與所不能。不以己之不能。害人之能。使能之總量。涓滴得達於用。理本至顯。無待講明。獨不解今人好言覺悟。凡有頓挫。其所言覺悟。亦未始無幾許誠意。而於其夙昔之所爲。曾強不能以爲能。其自是而非人。所是不過是其所是。所非不過非其所非。人之相讖。易地有然。凡此種種。乃若昧然無所曉治。昔者顏延之見劉湛殷景仁專當要任。意有不平。常云。天下之務。當與天下共之。豈一人之智所能了。須知延之在位。劉殷所諷。亦必相同。自知之明失。責己之意疏。情啓於得隴。智昏於可欲。此誠人情之所不能安。而大亂所由環起者也。故欲已亂。必先明能。

右舉各義。意在寓正面於負面。以消極爲積極。負面之功至。正面之業即寓其中。消極之意深。積極之效即因而起。舉凡一挑半剔。朝秦暮楚。賣弄身手。欺侮人智。容頭過身。無關本計之種種小策。宜絕其本根。弗使能植。謂無總統。姑與之爲無總統。謂無內閣。姑與之爲無內閣。甚且謂無國會無憲法。亦姑與之爲無國會無憲法。吾國約法。早等空文。憲法屬草未成。迄未布達。國會時斷時續。續亦

未嘗暢行職權。總統內閣。事實上今乃無有。而四海晏然。並未以此別生藤葛。今天下明明以爭總統而亂。未聞以無總統而亂。此雖一時偶有之政實。著爲通則。未始不宜。儒者之弔無君。史家之談正統。迷罔拘謬。其在今日。果何足道。眞謀國者。承此番大變之後。非有允協國情。確孚衆志。使各方情感利害。相劑而安。才能願欲。如位以出。經權兩洽。久暫可用。大國小己。俱各榮昌之根本方案。不宜輕有主張。客曰。善則善矣。其事毋乃太難。愚應之曰。本知足之懷。嚴量能之義。以負爲正。同趨一鵠。此其事取決由於一己。所爭乃在不爲。何難之有。何難之有。爰本孟氏擴充仁義之說。爲之言曰。人能充無欲曹錕爲總統之心。而政不可勝用也。作充無論。

（錄自長沙章氏叢稿）